

四庫全書

子部

欽定四庫全書

子部

正蒙初義卷一

詳校官典籍臣潘奕雋

編修臣程嘉謨覆勘

總校官庶吉士臣倉聖脉

校對官中書臣溫汝适

謄錄監生臣席天賓

欽定四庫全書

子部一

正蒙初義

儒家類

提要

臣等謹案正蒙初義十七卷

國朝王植撰植有皇極經世解別著錄是編詮  
釋正蒙於大全所收集釋補註集解外取明  
高攀龍徐德夫

國朝冉覲祖李光地張伯行之註列程朱諸說

之後並採張子經學理窟語錄性理拾遺三書相發明者附錄之而各以已見叅訂於後其大旨謂張子見道原從儒釋異同處入手故其言太虛皆與釋氏對照又謂太虛有三義又謂程朱多不滿此書太虛二字然晰其本旨殊塗同歸正不必執程朱諸論以詆之又謂書箋詩序禮疏舊說張子所用為多今人習見習聞皆程朱遺澤遂訖而怪之但當



分別讀之不宜橫生訾議其立論皆持平頗  
能破門戶之見其謂張子自注惟見於參兩  
神化至當三十樂器者各一見於王禘者五  
乾稱者四諸本或以集釋之說誤為自註又  
謂十七篇為蘇昞所傳張子手定李光地本  
多割裂其辨析皆為不苟至所稱張伯行註  
出於他人之假名非所自著云出伯行面言  
亦足資考訂也乾隆四十四年四月恭校

上

總纂官

臣

紀昀

臣

陸錫熊

臣

孫士毅

總

校

官

臣

陸

費

墀

正蒙初義原序

余家世讀書未嘗就外傅幼時從家君授讀繼從先大父館於外先大父為學非聖之書不讀歲九經性理誦必周年八十餘猶彊記不忘諸從遊問典故必舉某經篇目分割辭義示之或取先儒之說相發明余讀四子書成誦即授孝經繼以太極通書西銘繼以正蒙曰註疏僅詮聖人之言濂洛關閩所以傳聖人之意也實裨身心學不可後然余苦正蒙難讀且以少註說為憾偶

得一家言皆質問大畧藏諸篋中書不可得者必借錄成帙如是者積之久乙酉鄉薦後游歷四方獲與十五國賢士遊輒時時以此為志蓋閱二十餘載一再易藁而後敢彙而次之當其曉披夜誦朝信暮疑舊說之存者什五六而已其直空舊說自出心悟者亦往往而有也先是同邑宋子銳臣晉州趙子彤元皆嘗有志於是互相往復者歲餘辛丑春謬叨南宮攜所業於京邸同年生蜚英陳君見而嗜之攜之去次第手寫成冊隻字

片語皆惜若拱璧然余曰是書粹諸家成言頗踴訓詁  
餘習聊備初學之一義耳方欲芟其蕪冗祛其岐二以  
易今藁君何嗜之篤乎陳君曰說書欲瑩白如話此帙  
詳明曉暢人人如意所欲出況橫渠得自苦思力索之  
餘方晦澀是懼何必若郭象註莊又以聾牙詰屈與橫  
渠較奇耶精理久蝕請就我錄本速成之何如余曰諾  
哉遂與家弟膺如寧文慎加覆校大義則決之家君三  
閱月而告竣既為臆說十有七條總其綱要復識所由

於書首以歸陳君是正焉  
深澤王植自序

序論

程子答張子書曰所論大概有苦心極力之象而無寬裕溫柔之氣非明睿所照而考索至此故意屢偏而言多窒小出入時有之明所照者如目所睹纖微盡識之矣考索至者如揣料於物見彷彿耳能無差乎更望充養思慮涵泳義理他日自當條暢○子厚謹嚴纔謹嚴便有迫切氣象無寬舒之意○答楊中立書云橫渠之言誠有過者乃在正蒙○子厚以清虛

一大明天道是以器言非形而上者。○橫渠立清虛一大為萬物之源恐未安湏兼清濁虛實乃可言神道體物不遺不應有方所

龜山楊氏曰正蒙之言關中學者尊信之與論語等其徒未嘗輕以示人蓋恐未信者不惟無益徒增其鄙慢爾如西銘一篇伊川謂與孟子性善養氣之論同功皆前聖所未發也詳味之乃見其用意之深性命之說雖揚雄猶未能造其藩籬況他人乎而世儒易



言之多見其妄也孔子曰五十而知天命以孔子之  
聖猶待五十而後知則所知蓋有未易言者非止如  
世儒之說也學者當求之聖人不當徒為空言而已  
五峯胡氏曰先生極天地陰陽之本窮神化一天人所  
以息邪說而正人心故自號其書曰正蒙其志大其  
慮深且遠矣

朱子曰橫渠作正蒙時或夜裏默坐徹曉其勇如此故  
其書規模廣大欲盡窮萬物之理○正蒙精深難窺

測要其本原則不出六經語孟且熟讀語孟以程門  
諸公之說求之涵泳其間自有所得然後此等文字  
可循序而及方見好處如今不須雜博却不濟事無  
收拾也若果於此有味則世間一種無緊要文字皆  
是妄言綺語自無工夫看得矣○正蒙所論道體覺  
得源頭有未是處故伊川云過處乃在正蒙答書之  
中云非明睿所照而考索至此蓋橫渠却只是一向  
苦思求將向前去却欠涵泳以待其義理自形見處

如云由氣化有道之名說得是好終是生受辛苦聖  
賢便不如此說試教明道說便不同如以太虛太和  
為道體却只是說得形而下者皆是發而皆中節謂  
之和處○正蒙說道體處如太和太虛虛空云者止  
是說氣說聚散處其流乃是箇大輪迴蓋其思慮考  
索所至非性分自然之知若語道理惟是周子說無  
極而太極最好如由太虛有天之名由氣化有道之  
名合虛與氣有性之名合性與知覺有心之名亦說

得有理由氣化有道之名如所謂率性之謂道是也然使明道形容此理必不如此說伊川所謂橫渠之言誠有過者乃在正蒙以清虛一大為萬物之原有未安等語概可見矣○答江仲謀論正蒙書曰道之極致物我固為一矣然豈獨物我之間驗之蓋天地鬼神幽微隱顯本末精粗無不通貫而為一也正蒙之旨不外是然聖賢言之亦已多矣正蒙之作復何為乎然須反覆研究其說求其所以一者而合之於

其所謂一者必銖銖而較之至於鈞而必合寸寸而度之至於丈而不差然後為得也

門人范有序曰張夫子之為此書也有六經之所未載聖人之所未言蓋道一而已語上極乎高明語下涉乎形氣語大至於無間語小入於無朕一有窒而不通則於理為妄正蒙之言高者抑之卑者舉之虛者實之礙者通之衆者一之合者散之要之立乎大中至正之矩天之所以運地之所以載日月之所以明

鬼神之所以幽風雲之所以變江河之所以流物理以辨人倫以正造端者微成能者著知德者崇就業者廣本末上下貫乎一道過乎此者淫遁之狂言也不及乎此者邪諛之卑說也推而放諸有形而準推而放諸無形而準推而放諸至動而準推而放諸至靜而準無不包矣無不盡矣無大可過矣無細可遺矣言若是乎其極矣道若是乎其至矣聖人復起無有間乎斯言矣

門人蘇昞序曰先生著正蒙書數萬言一日從容請曰  
敢以區別成誦何如先生曰吾之作是書也譬之枯  
株根本枝葉莫不悉備充榮之者其在人力而已又  
如晬盤示兒百物具在顧取者何如耳於是輒就其  
編會歸義例略效論語孟子篇次章句以類相從為  
十七篇

元儒黃氏瑞節曰張子有文集諸經說語錄皆其門人  
記錄之書朱子取以入近思錄凡八十條惟正蒙乃

其手所撰著云。朱子掇取周子張子程子之書為  
近思錄凡六百一十二條自正蒙來者二十六條又  
於正蒙中表章西銘自為一書嘗述靜春劉氏之說  
曰宋有四篇文字太極圖西銘易傳序春秋傳序是  
也二序伊川程子之筆云。又按東萊呂氏云知言  
勝正蒙朱子曰正蒙規模大知言小知言蓋五峯胡  
氏所撰云



臆說

十有七條

正蒙一書二萬五百餘言其中窮理格物之事多而工夫入手處亦未嘗不詳蓋微而天人理氣神化性命之精顯而脩齊治平禮樂政教之蹟細而一名一物曲文繁節之數固不研精探微著厥要蘊故自謂如晬盤示兒百物具在又如枯株之根枝悉具充榮在人蓋其規模大取精多用力宏矣無畏難而自阻無多疑而橫議勿助勿忘方可卒業

正蒙十七篇以首末二篇為經中十五篇為緯其間千條萬緒無所不及而皆以首末為之綱領考其所言有與周程同者有與周程異者不同不足見本原之合若盡同又何以見各得之妙學者但當以張子之說還張子若執程周緒論以合之反多轉轉滋為擾耳

張子言太虛不若周子言太極之妙故程朱皆有所不滿蓋太極理也太虛氣也言太極則太虛在其中而

太虛固不足以包太極也然張子必以太虛立言者  
蓋有故焉藍田呂氏稱張子早歲嘗訪諸釋老累年  
盡究其說知無所得乃反而求之六經竊意其早歲  
時已於二氏虛無之旨洞其底蘊熟於胸中及後求  
之六經仍從熟處思量因以見吾道之精與虛無之  
謬學者不究其由來而妄訾其失烏乎可也

太虛二字是看正蒙入手關頭於此得解以下迎刃而  
解矣竊意太虛一而已矣而各節所舉為言者不同

宜以三層槩之太虛無形塊然太虛此以渾然未形者言之為天地萬物之大母在造化則本此以生天地在天地則本此以生人物乃氣之本體先儒謂以清虛一大為萬物之原恐未安者此也此第一層也清通不可象之神太虛為清無礙故神與夫升降飛揚未嘗止息此以流行徧滿者言之周乎天地人物之先而貫乎其內乃氣之發用即太和之謂也言其清通則曰太虛言其流行則曰太和異名而同實者

也此第二層也於此層中析而言之有屬之天地者  
乾坤清濁是也以理則言易簡以氣則言浮降有屬  
之萬物者品物流形是也以氣則言散殊可象以形  
則言風雨雪霜萬品山川要之皆在第二層中但既  
言清即合下有一濁字作對先儒謂不知形上還他  
是理形下還他是氣者此也至萬物散而為太虛散  
亦吾體此又從既生人物之後而要其終先儒謂其  
流乃是大輪迴者此也此第三層也如此則各節所

言之太虛言雖殊而意自貫左右逢原而各盡其致  
矣竊將太和乾稱二篇逐節思索覺頭腦在此絲絲  
不亂於此未徹而但隨文立訓以求可通恐不免散  
錢一屋之誚耳

首末二篇或言太虛或言性性即指太虛之本體而言  
與程朱所謂性即理者亦微別其言神言化言命皆  
即太虛之流行者而分別言之蓋寂然不動則一而  
已感而遂通乃有三者之異名性乃太虛第一層神

化命皆太虛之第二層也然性雖屬第一層實貫乎第二三層之中蓋太虛三層第以未發已發發本要歸不容無辨非判然有三事也如首篇知死之不亡者可與言性性已帶在第三層言凡此皆須善會

張子見道原從儒釋異同處入手故其言太虛皆與釋氏對照太虛第一層無形之本體所謂天者道所從出也釋氏即以虛為道故以心法起滅天地所謂不知道者此也第二層太虛之清通而神正於氣上見

功用而釋氏以天地人事為幻妄疣贅所謂不知天  
人者此也第三層人物之散仍歸太虛而釋氏以為  
輪迴復生所謂不知鬼者此也竊謂張子闢二氏處  
不但妄意天性數節其言虛言氣直與之對照到底  
原其以此立說者正欲使吾道明而異說自息謂正  
蒙為張子闢邪之書可也

太虛是張子主見其言天言性處觸著便提起首末二  
篇外如參兩篇一神兩化太虛無體神化篇虛靈照



鑒神之明也誠明篇未嘗無之謂體體之謂性天性在人猶水性在冰大心篇釋氏不知天性以心法起滅天地皆是此旨蓋張子以太虛為性命之原萬物之本故觸處皆見此意朱子於太極二五謂周子些子活計盡在裏許竊於橫渠亦云

張子言天道言人性大意有二其謂太虛而神不滯於氣者對庸人之拘於形器者言也如無礙故神性通極於無之類是也其謂以虛為體不離乎氣者對二

氏之溺於虛無者言也如虛空即氣有無虛實通為一物之類是也合看方無弊故每於一篇之中二義並見云

張子言人性分天地之性氣質之性與程朱大同惟其言命處則小異程朱所謂命者兼窮通得失而言張子則以當得而得者為命故曰通極於性遇不足以戕之又曰命天理皆於氣數中認取理字而以此為正命至當得而不得者則以為遇之適然而非命也

雖似過高亦前此所未發

正蒙原本篇節蘇氏所請定也竊意原書係張子所手  
著篇分十七則因蘇氏之請而為之所謂輒就其編  
會歸義例以類相從為十七篇者是也李注於難解  
之處割裂最多雖詮注易明恐失橫渠本意不若大  
全原本為善矣

正蒙之有自注也見於參兩神化至當三十樂器者各  
一見於王禘者五乾稱者四有意旨未盡自為小注

以發之者有錄經文成語而為之注明其意者當與  
大文叅讀以盡其義諸家本或有以舊注誤作自注  
者如大心篇成心者私意也此章言心者亦指私心  
而言也夏虫疑冰以其不識皆雜以集釋之說是也  
有以訛承訛而強為之解者如乾稱篇含氣有象否  
二語誤附次節是也

正蒙所援引不出四書五經用字間出老莊諸子遠鄉  
下邑及初學之士或寡陋莫知其由來者有之今為

詳列篇章間錄原注庶源流可考折衷有歸焉至詩箋書叙禮疏舊說張子所用為多今人習見習聞皆程朱遺澤遂咤而怪之不知於時正學初明義未大暢但當分別讀之不宜橫肆訾議而學者於此亦可想見程朱之虛心精力多少甘苦也

橫渠集正蒙而外有經學理窟一卷語錄一卷性理拾遺一卷其中與正蒙相發明者俱足見先生意旨而諸家正蒙說多考據未詳遂涉彷彿影響之間今為

附錄各節之下庶得相參以得其真又先儒說關正  
蒙者大全多為錄入非惟一書之折衷實窮理之準  
的也今仍之至諸為朱子所採取者亦附詳於後用  
備考焉

源洛闢闢並垂百世而正蒙之傳未若程朱之書之盛  
者義蘊宏深復聲句聳牙故也訓釋之家或未晰本  
旨但執程朱緒餘以雜之反是又或食耳信目但執  
程朱緒餘以詆之士或瞽守一師固知別擇其貽誤

豈細故哉考正蒙註大全所收集釋補註集解外嘗  
得數家焉集註明季無錫高忠憲公攀龍雲從甫著  
發明明季嘉興徐某德夫甫著補訓本朝詞林年陽  
冉覲祖永光甫著李注大學士安溪李光地厚菴甫  
著張注大宗伯儀封張伯行孝先甫著然余嘗面質  
之宗伯曰非我所為他人假我之名者耳華注康熙  
庚子舉人無錫華希閔豫原甫著集釋三書未詳纂  
述姓氏或曰集解明正德間四明余本子華甫著補

註明正統間副都御史常熟吳訥思菴甫著合諸家之說互參異同刪煩訂謬正蒙一書亦庶幾可得其大凡乎

太和至至當九篇及末之乾稱一篇皆通篇一意血脉貫通雖文多不相蒙而大意可會作者至有司四篇皆節各一義隨見屬書與前之血脉貫通者微異大易樂器王禘三篇則訓釋之體耳竊謂血脉貫通者宜於文不相蒙之中會其大意相屬之處發明補訓



因意之相貫並欲其文之相承反致瞻顧失旨迤邐  
無序其失也蔓前十餘篇稱引詩書之文雖體若訓  
釋而意在發明本篇與大易三篇不同補注槩以注  
釋之體律之而未盡意言聯注之妙其失也離至其  
節次相屬或一節一意或數節同意或前後節各一  
意而蟬聯以相足宜先求本節之義以達其旨然後  
參相屬之故以盡其理而諸家又或失之雜或失之  
固也

諸家之說大抵前者疏而後者密前者畧而後者詳今於前說未確而後說為之駁正者或偶存前說或專錄後說俱以後說為主若一節大意立說語意雖訓詁之細亦初學所必需今於諸家節旨明確者皆摘一存之或有未確則僭補愚見之內順講有可存者即列節旨後間於諸家之說有刪繁去複或增減數字而存之者亦竊效朱子所謂其說有病不欲更就下而安注脚之意而未敢云有似也

經書之有注釋期于發明義理而止圖圖因襲依口學  
古者固非好學深思之士若偏執已見而是我非人  
亦好異之過也涵泳白文玩其意趣合觀前後求其  
指歸書之精理自出而又宜以平實為主無蹈新奇  
纖巧之徑庶得紫陽家法若人操一說以詮注為築  
室以異同成聚訟能必人之信我如我之自信乎愚  
見附入諸家後者特千慮之一得自知孤陋寡聞謬  
戾孔多先生長者不以為不足教而辱進之使獲聞

所未聞敬當虛懷以改

欽定四庫全書

正蒙初義卷一

邳州知州王植撰

太和篇第一

大全此篇推明太和之氣陰陽運化人物賦受皆是物也

愚按此篇凡二十二節前十一節發明太虛之妙兼體用言之後十一節明一神兩化之義皆太虛

之用也其謂虛空即氣不可以有無言者見虛與  
氣未嘗相離其以清屬神濁屬形而對舉之者亦  
見虛與氣不可相無皆所以絀二氏虛無之謬而  
庸人之徇形者亦可以悟矣○篇中言太虛有以  
未發之體言者有以流行之用言者有以究極之  
歸言者竊嘗以三層槩之其說已見總論矣而或  
者狃於舊說皆以太虛為理且謂與周子言太極  
同義不知太虛與太極確有不可得而強同者蓋

太極一圖本易易有太極數語建圖屬書以發所  
見其說由理而氣而形從原頭說下因端竟委以  
極其義所謂太極云者雖云不離乎氣而實以其  
不離乎氣者而言故形而上下之分劃然不淆而  
意之周匝言之簡盡皆純粹以精而無之可疑太  
虛之云則因二氏崇虛之見而為之說以訂其蒙  
其說由虛而氣而形蓋氣有清濁濁者滯於形象  
而不能通清者則虛空洞達神妙莫測足以超乎

形象之外而為天地人物之本故名以命之曰太  
虛太虛一而已而以為有三層可言者蓋上而推  
之天地人物之先則萬物之形皆本於無形其湛  
然無形而足以形形者是太虛之本體所以主宰  
於上而為生生之原者也造化所以生天地者以  
此故曰太虛無形氣之本體天地所以生人物者  
亦以此故曰由太虛有天之名所謂性之中涵而  
為感之體者也中而推之萬物有生之初凡二氣



之絪縕天地之對待陰陽之流行皆太虛之妙用  
所以為生生之具也而及其有形之後則凡散殊  
可象之迹莫非太虛之所流貫而其虛空無物之  
處雖至幾微冥渺容光一髮之隙亦莫非太虛之  
流行而充塞焉所謂太和之道清通無礙而神者  
也極而推之人物既生以後生既盡矣又不能不  
化有形而無形是復還於太虛也所謂形潰反原  
而散亦吾體者也是其深思冥會於未有天地之

先凝心妙契於既有事物之後豁然一貫左右逢  
原而後著為一書以闡性命之精以闢異端之謬  
夫豈苟然而已哉但其所見至太虛而止而最上  
一層之宰乎此氣之中統乎人物之終始所以貫  
清濁該有無寓於氣而仍不雜乎氣者尚未之及  
焉則是纔說太虛便已落第二義即云無聲無臭  
足以與理為體而究未若太極一言為得理之本  
體也其言及人物既生以後亦止言其為太虛之

所流行而充塞而於人物之各具一理不離乎氣而仍不雜乎氣者亦未嘗顯白軒豁以言之故程朱謂其所言是形而下者非形而上者如云合虛與氣有性之名有無虛實通為一物者性也較之周子則言太極者如言性而直言心之理言太虛者如言性而但言心之虛靈心之虛靈雖亦所以具是性者却直作性字不得即謂其見到而說不到亦不得也且不言理而但言虛將展轉說去終

無準紀其流必有所蔽故先儒謂其流乃是箇大輪迴而張子亦恐不善會者之或至是也故其言虛又必兼言氣故曰惟盡性者能一之又曰兼體而不累者存神其至矣又曰虛空為性本天道為用又曰語性與天道之極盡於參伍之神變易而已則其意之周匝言之精密足以自救其說而與釋老之說天淵也由此以思二子所見蓋有不得而強合者豈但其詞之偶異已乎○篇內缺然太

虛一節鬼神者二氣之良能也一句游氣紛擾一節朱子俱入近思錄道體條

太和所謂道中涵浮沉升降動靜相感之性是生絪縕相盪勝負屈伸之始其來也幾微易簡其究也廣大堅固起知於易者乾乎效法於簡者坤乎散殊而可象為氣清通而不可象為神不如野馬絪縕不足謂之太和語道者知此謂之知道學易者見此謂之見易不如是雖周公才美其智不足稱也已

徵引易乾卦彖保合太和本義太和陰陽會合冲和之氣也繫辭下傳之五章天地絪縕本義絪縕交密之狀繫辭上傳之一章八卦相盪又云乾知大始坤作成物乾以易知坤以簡能本義知猶主也五章成象之謂乾效法之謂坤本義效呈也法謂造化之詳密而可見者○莊子逍遙遊篇野馬也塵埃也生物之以息相吹也注司馬云野馬春月澤中遊氣也○朱子曰此以太和狀道體與中庸發而中節之和無

異

補注太和即太虛陰陽冲和之氣也中涵浮沉升降  
動靜相感之性是言其體是生絪縕相盪勝負屈伸  
之始是言其用其初來也幾微易簡其究極也廣大  
堅固此以其流行者言也起知於上便能始物而無  
所難為乾效法於下皆從乎陽而不自作為坤此以  
其生物者言也散為萬殊有象可見為氣即所謂生  
物者也清明通達無象可見為神即所謂流行者也

易謂周易所以論天道者也

補訓此節全於二氣絪縕處見太和故兩提絪縕字而溯原於性是上一層中庸以鳶飛魚躍言道之費是即氣化上見道張子以太和謂道亦此意太和句是冒語浮沉升降總是動靜相感宜總承上六字絪縕是氣之凝結鼓盪處相盪則有勝負屈伸幾微言其細易簡言其妙廣大橫說堅固豎說起知二句補注與上分流行生物此生物即從上流行處見非截



然兩項有形者氣無形者神神在氣中重神邊補注  
以氣承生物神承流行未確流行生物總是散殊之  
氣而皆有清通之神在其中不如云云反言以綴上  
文

華注中涵句是就已發中指其未發之體而言是生  
二字從中涵來絪縕相盪勝負屈伸總不外浮沉升  
降動靜惟中涵其性是以爲生之始

愚按此節大意本易太和字以氣化明道也太和

即太虛之第二層中涵之性帶第一層言之。語  
意云人之言道者亦知所謂道乎吾謂太和之氣  
即所謂道也所謂太和者蓋中涵夫浮沉升降動  
靜相感之性以為之體於是生夫二氣絪縕相盪  
勝負屈伸之端以為之用就其用之流行者言之  
其初來也幾微易簡而不可見其究極也廣大堅  
固而不可窮就其流行者之功用言之則始之有  
感必通而無阻難者即乾道乎呈造化之法而不

煩力者即坤道乎總而言之凡兩間之內散為萬  
殊而有象可見者為氣清明通達無象可見者為  
神神即太和太和即道也倘不如野馬而絪縕相  
盪不足謂之太和而道於何見乎凡語道者知此  
太和謂之能知道學易者見此太和謂之能見易  
不如是雖有周公之才之美其智不足稱矣信乎  
語道者不可不深體乎太和也○先儒言氣之詳  
莫如張子如此節以太和言氣而一氣字中又層

層分析言之首句總提起以下詳其義中涵句是  
太和上一層未有此氣先有此理也是生句方說  
到太和既有此理即有此氣之機也然尚未及其  
流行處其來二句乃就流行處言乾坤易簡又即  
流行者之功用言之乾坤者陽健陰順之氣而天  
地之形與天地生物之理皆在其中此四句乃太  
和正位蓋其來其究是豎說其流行者起知效法  
是於流行中橫分其對待者當分兩層串說而非

二事散殊二句總上四句意仍挽到太和蓋物之  
濁而有迹者皆氣氣中之清而無迹者為神神即  
太和之謂也此雖非截然有許多層次可分實確  
然有數層道理可言而總之見太和之無不在也  
故曰不如野馬網緼不足謂之太和網緼內該得  
浮沉升降勝負屈伸意在末言道應上所謂道並  
及易者以太和字出於易也與太極圖說篇末大  
哉易也義同○太和謂道與一陰一陽之謂道大

意相似亦精於狀道之詞但只就氣言而未及理之不雜乎氣者故朱子謂與發而中節之和無異玩語意正以太和為道補注謂太和是氣所以然者乃是道未免多作幹旋矣中涵與是生作對補訓承上句謂道中所涵非是其來二句猶周子發微不可見充周不可窮之意幾微易簡者氣之始動如復之一陽初生是也廣大堅固則以其充滿盛大者言之凡氣之凝形成象為天地為人物者

皆是也起知於易二句以大易篇所謂無體感速  
不煩施普者觀之則張子者知字與本義微異諸  
家多泥舊義未是散殊可象所包甚廣凡天地之  
化風雨露雷幽明寒暑之類天地間山川人物之  
類有迹可見者皆是即後所謂反清為濁者也不  
可象亦有二意幾微易簡時固不可見即廣大堅  
固時而不可見者自在即後所謂清則無礙無礙  
故神者也知此則幾微易簡廣大堅固與起知於

易效法於簡原非二事補注以散殊二句分承流行生物固未確矣然補訓知以流行生物魚氣與神而亦未能確見神之即太和也大抵諸家各有短長故節錄其說而為辨之如此

太虛無形氣之本體其聚其散變化之客形爾至靜無感性之淵源有識有知物交之客感爾客感客形與無感無形惟盡性者一之

朱子曰客感客形與無感無形未免分截作兩段事



聖人不如此說只說形而上形而下而已

發明此節論氣而合之人。氣有無形容形人有無  
感客感程子所謂體用一原顯微無間非有二也人  
知體虛空為性又知本天道為用斯一之矣

補訓夫太和不離太虛太虛之始無有形狀乃氣之  
本體然也及氣之呈露則有形矣然其聚其散不過  
此變化之客形耳非常形也其在人則至靜而無所  
感觸乃性之淵源也及性之發動則有感矣然具有

識有知不過物交之客感耳非常感也此客感客形  
與無感無形原非有二人自溺於客感客形而昧之  
惟盡性之聖人乃能以無感無形御夫客感客形而  
合一無間也。本來無形即是本體猶云氣之起根  
原無形也有聚有散即是變化客對主言無形是主  
有形是客靜是主感是客雖分客主不可相無盡性  
者一視之盡性即能體道故以盡性兼綰氣一邊識  
淺知深交自外來感自內動

李註周子謂之太極而張子謂之太虛者太極如性  
字太虛如靜字太極如中字太虛如未發字人生而  
靜天性具焉非以靜為性也喜怒哀樂未發而中存  
焉非以未發為中也太虛無形而無極之真在焉非  
以太虛為太極也

張注有無皆道寂感皆性無所謂客也言體用可耳  
下客字太險

愚按此節首句即太虛第一層正義也聚散變化

又言及第二層○無形即上中涵之性變化客形  
即上所謂浮沉升降動靜綱緼勝負屈伸也至靜  
無感即人心之太虛無形物交客感即人心之變  
化客形也然有無虛實通為一物者性也故曰盡  
性者一之蓋虛靜之中事物之理無不具必事物  
各盡其道而後無形無感者免全具體此能一之  
義也○諸家以太虛太和分體用蓋以第一層與  
第二層對言也無形處即是氣之本體李注謂太

虛無形之中氣之本體存焉即太極也無形本體  
說作兩層不免混入程朱甲裏非張子本意又張  
子言性與神處俱以性屬第一層神屬第二層觀  
末篇感者性之神性者感之體等語可見補注皆  
以為氣之體亦未確○太虛之義分三層足以貫  
之而其立言不一皆當隨文體認細玩篇中之意  
惟由太虛有天之名合虛與氣有性之名此若必  
以理言之方可通然亦張子所見止至太虛而止

若遂以為生物之理之盡乎此也者而實未盡也  
故朱子雖亦以理字釋之而亦謂其生受辛苦聖  
賢便不如此說蓋非理字不足為言而直以理字  
代之則不可也若太虛不能無氣萬物不能不散  
而為太虛氣之聚散於太虛太虛為清萬象為太  
虛中所見之物此類如以理字訓之則將謂萬物  
散而為理氣之聚散於理萬象為理中所見之物  
於說通乎又如太虛無形虛空即氣虛能生氣氣

塊然太虛太虛妙應之目氣本之虛則湛此等直  
以氣言似未盡而亦何可直以理字代之也皆當  
得其言殊而意不悖處大抵張子所論與程朱宜  
各為一說朱子稱康節於那陰陽相接處看得分  
明與周程小有不同正蒙論氣處亦宜如此

天地之氣雖聚散攻取百塗然其為理也順而不妄氣  
之為物散入無形適得吾體聚為有象不失吾常太虛  
不能無氣氣不能不聚而為萬物萬物不能不散而為

太虛循是出入是皆不得已而然也然則聖人盡道其  
間兼體而不累者存神其至矣彼語寂滅者往而不反  
徇生執有者物而不化二者雖有間矣以言乎失道則  
均焉

徵引易繫辭下傳之十二章愛惡相攻而吉凶生遠  
近相取而悔吝生

華注此明體用之一原也因上章無形容形似說作  
兩層故申言之



補訓夫天地者積氣之區也天地之氣雖其為聚散  
為攻取塗轍有百然其為理也皆順其自然而無偽  
妄所以然者氣之為物散則入於無形而非滅也適  
得吾之本體本體固如是其無形耳聚則彰於有象  
而非增也亦不失乎吾之常然吾常固不嫌於有象  
耳始之太虛非真虛也不能無氣以充之既有氣不  
能不聚而為萬物所以聚為有象也萬物不能不散  
為太虛所以復散入無形也循是二者一出一入出

則有象入則無形是皆理之自然不得已而然所謂  
順而不妄者也聖人盡道於天地之間能以寂然不  
動體其無形而恬如以感而遂通體其有象而秩如  
魚體二者而一無所累所存於中而神妙不測者蓋  
極其至矣即所謂盡性者能一之也彼異端專語寂  
滅者但云一往而不復返是知散而不知聚若徇其  
生而執所有者又徇於物而不知變化是知聚而不  
知散二者雖有間而皆昧於自然之理其為失道則

均焉信乎惟聖人為盡道也。○前四句提起氣之為物以下至而然也是申明前四句之意因言聖人盡道並及異端失道聚散平言聚為萬物散為太虛攻則散取則聚攻取只貼聚散說順字與不得已相照應順其自然便無妄適得猶言恰合也出屬聚入屬散道字應理字其間應天地字存神借用孟子所存者神而意不同謂所存於己者神妙不測合聚散為一致也有間只是有分別不必辨其優劣

李注上言盡性者能一之此言盡道者兼體之盡性則能體道意互相發寂滅者異端之蔽徇生者百姓之愚

愚按此節太虛不能無氣即太虛之第一二層物不能不散而為太虛即太虛之第三層也。順者行其自然不妄者實然而無偽也氣之為物五句聚散對言太虛以下述言之總見虛氣之未嘗相離也故以兼體不累歸之聖人寂滅孰有李注分

異端百姓為允末篇亦多以異端俗學並言而其  
所謂梏於聞見引取於耳目者正猶生執有之實  
耳

聚亦吾體散亦吾體知死之不亡者可與言性矣

李注又申適得吾體不失吾常之意

補訓夫氣之有聚散在人不可二視也聚亦吾本體  
之不失其常也散亦吾本體之適相得也夫散則幾  
於亡矣然散亦吾體是死而不亡也能知死之不亡

者乃可與言性矣。○吾體即謂氣體非謂身體氣散於人身仍在天地之間即死而不亡

集解性即太虛之道不亡者即此道也非謂吾死猶有精靈不亡如佛氏所云也此等處皆須精別蓋以其強探力索所得故言有此未瑩者耳

愚按散亦吾體乃太虛第三層正義也既以太虛立言其歸結必至於此正其立論不能無弊處然所謂死之不亡即末篇形潰反原游魂為變意正

以此明輪迴之妄非反捨其殘滓也宜善會之

知虛空即氣則有無隱顯神化性命通一無二顧聚散  
出入形不形能推本所從來則深於易者也若謂虛能  
生氣則虛無窮氣有限體用殊絕入老氏有生於無自  
然之論不識所謂有無混一之常若謂萬象為太虛中  
所見之物則物與虛不相資形自形性自性形性天人  
不相待而有陷於浮屠以山河大地為見病之說此道  
不明正由惜者畧知體虛空為性不知本天道為用反

以人見之小因緣天地明有不盡則誣世界乾坤為幻  
化幽明不能舉其要遂躐等妄意而然不悟一陰一陽  
範圍天地通乎晝夜三極大中之矩遂使儒佛老莊混  
然一途語天道性命者不罔於恍惚夢幻則定以有生  
於無為窮高極微之論入德之途不知擇術而求多見  
其蔽於諛而陷於淫矣

徵引老子去用篇天下萬物生於有有生於無象元  
篇人法地地法天天法道道法自然虛心篇道之為



物惟恍惟惚後漢書桓帝宮中立黃老浮屠之祠。  
易繫辭上傳之五章一陰一陽之謂道四章範圍天  
地之化而不過又云通乎晝夜之道而知本義通猶  
兼也晝夜即幽明死生鬼神之謂二章六爻之動三  
極之道也本義三極天地人之理三才各一太極也  
○釋氏金剛經一切有為法如夢幻泡影

補訓此節意在合虛與氣見人不可專認虛空為性  
而以形氣為輕也。夫虛空與氣不容二視也知虛

空之即氣則凡為有無為隱顯與夫神化性命皆通  
一而無二矣但其聚而出則有形散而入則無形人  
遂二視之能推本其所從來而知虛空即氣則深明  
於易學者也若謂虛空能生出氣來則虛無窮盡氣  
有限量是體用不齊相去殊絕入於老氏有生於無  
自然之論而不識所謂有與無混合為一之常道矣  
若謂萬象森然皆為太虛中所見之物則物與虛分  
為二不相資藉形自為形性自為性形而為人性本

於天兩不相待而有陷於浮屠氏以山河大地為見  
病之說矣蓋此虛空即氣之道不明正由昏懵之人  
畧知體虛空為性不知本天道陰陽以為用反以人  
見之小因緣以論天地之大其明有不盡則誣世界  
乾坤為幻化是其於幽而虛明而氣不能舉其至要  
遂躐等妄意而為此一偏之論耳豈知世界乾坤皆  
有實理而非幻化乎總之人惟不悟一陰一陽之道  
足以範圍天地通乎晝夜而為三極大中之矩遂使

吾儒與釋氏老莊混然出於一途凡語天道性命者  
不誣罔於釋氏之恍惚夢幻則定以老氏之有生於  
無為窮高極微之論其於入德之途不知擇術而求  
之多見其蔽於二氏之詖辭而陷於二氏之淫辭也  
豈不惜哉○知所從來虛空即氣則易理盡於是故  
曰深於易下文一陰一陽數句應此易字浮屠者佛  
氏之號浮屠以山河大地有可見而為病患湏寂滅  
無形方無係累也

華注此虛空即氣四字為一章之主有無隱顯以氣  
言神化性命以理言推本所從來意重在推本聚所  
從來欲人識虛空即氣也老佛皆岐有無隱顯神化  
性命而二之而老氏之旨則崇無黜有佛氏之旨則  
視有皆無大同小異總是畧知性而不知用也儒者  
知得用處俱是實理故於日用倫常間一一理會用  
功此正入德之途而二氏一切去之所以為詖淫也  
發明太虛不能不聚聚不能不散聚即散之從來散

即聚之從來即氣即虛更無別處從來虛能生氣生字與周子動而生陽靜而生陰之生不同周子只言有此次第老氏之生則是以此一物生彼一物截然分作兩件佛氏謂萬象為太虛中所見之物則是太虛反被萬象累了所以遂為見病此皆誤認所從來也

愚按此總太虛三層之意而言虛與氣之非二蓋為虛無之學者發也首八句為一節之冒下二段

分舉言性道者之謬此道不明以下雙承上二段而申所以陷入佛老之故不悟以下又承上段而申言不知天道為用之意玩通節語意皆指人之語性道者諸家謂直闕二氏尚體貼未細補訓欲以惜者數句專歸釋氏亦於文勢未合○虛空即太虛虛空無形者皆氣之充塞故曰虛空即氣也隱與無貼虛屬第一層顯與有貼氣屬第二層性以太虛之體言即上節可與言性之性神以太虛

流行之妙言即首節清通之神性與命對神與化對命是性之流行化是神之發用以性與神對則性屬第一層神與命與化皆在第二層內觀末篇各節自見體體貼本推本也以人見之小因緣天地即後大心篇所謂以心法起滅天地以六根之微因緣天地者也一陰一陽氣也而天地之道幽明死生鬼神之理皆不外此故曰三才大中之矩曰天地晝夜又曰三極上分下合只是一意。友



人宋子銳臣曰張子亦是以虛空為性而異在以  
天道為用

氣塊然太虛升降飛揚未嘗止息易所謂絪縕莊子所  
謂生物以息相吹野馬者歟此虛實動靜之機陰陽剛  
柔之始浮而上者陽之清降而下者陰之濁其感通聚  
散為風雨為雪霜萬品之流形山川之融結糟粕煨燼  
無非教也

徵引易絪縕見首節又乾卦象雲行雨施品物流形

○莊子野馬以息相吹見首節又天道篇君之所讀者古人之糟粕已夫注糟酒滓也糟爛為粕○禮孔子閒居風霆流形庶物露生無非教也

朱子曰塊然太虛此張子所謂虛空即氣也蓋天在四畔地居其中減得一尺地遂有一尺氣但人不見耳此是未成形者及至浮而上降而下則已成形者若融結糟粕煨燼即是氣之渣滓要之皆是示人以理○問言機言始莫是說理否曰此本只是說氣理

自在其中一動一靜便是機處。問始字之義如何  
曰始是如生物底母子相似萬物都從這裏生出去  
升降飛揚便合這虛實動靜兩句虛實動靜陰陽剛  
柔者便是這升降飛揚者為之非兩般也。○無非教  
也教便是說理禮記中天道至教聖人至德與孔子  
子欲無言天地與聖人都一般精底都從粗底上發  
見道理都從氣上流行雖至粗底物無非是道理發  
見聖人與天地皆然此等言語都是經煅煉底語須

熟念細省。或問此一段是造化之初否曰即今便是如此

補訓此節極言氣末無非教結到理上。○塊王逸云霧昧貌說文塵埃也霧塵皆是借形只是氣充滿意陽升陰降陰升陽降皆有飛揚意集釋上下曰升降行四方曰飛揚亦非確解息即鼻息吹猶呼吸也凡天地間虛實動靜陰陽剛柔皆氣之為以其所由發謂之機以其所由成謂之始隨遇而有聚有散風雨

雪霜內皆有聚散集釋散為風雨聚為雪霜亦未確  
融合也結聚也並言山川不必謂川融山結釀者有  
糟粕變者有煨燼皆謂渣滓至小者也教無所主當  
屬之天氣本非教氣有至理即為教也

集解氣塊然太虛言氣之塊然者即太虛也升降飛  
揚未嘗止息是時也雖未有虛實動靜陰陽剛柔之  
形而其機其始實在於此此自其未有天地萬物之  
前以明其所以為天地萬物者之理已其所謂體用

一原也浮而上者陽之清天以開也降而下者陰之濁地以闢也天開地闢又由是而陰陽二氣感遇聚散為風雨雪霜萬品山川糟粕煨燼無非教也此自其既有天地萬物之後以明太虛之理又無不因物而寓所謂顯微無間也

補注坎然太虛語具體也升降飛揚未嘗止息是其用也

華注虛實動靜之機是氣之妙用其理即所謂繼之

者善也陰陽剛柔之始是氣之所成就其理即所謂成之者性也

愚按此當與首二節參看塊然太虛即無形之本體也為第一層塊然即指太虛而言言氣之塊然者本太虛無形也升降飛揚未嘗止息即太和之清通不可象者也為第二層浮清降濁以下以屬於天地人物者言即所謂虛實動靜陰陽剛柔者也皆在第二層內一說此節無第一層意氣塊然

太虛三句皆屬第二層謂塊然於太虛中也竊謂  
朱子於通節分三層補注又以首三句自分體用  
所論更細似得張子本意○竊嘗論之曰夫有理  
而後有氣有氣而理即乘之故理為體而氣為用  
此諸儒所共言也由張子之言則氣自有氣之體  
氣自有氣之用而氣之體用又各自有體用之可  
分焉此非諸儒所共言而張子所以發前人之未  
發者也可得聞乎曰陰陽兩端循環不已立天地



之大義者氣之體也游氣紛擾合而成質生人物  
之萬殊者氣之用也然則何以言體之體體之用  
曰坎然太虛者渾然無朕之本體乎升降飛揚者  
相摩相盪之大用乎此在未有天地人物之先湛  
然而無形者也無形者皆體也然則何以言用之  
體用之用曰浮而清降而濁者其對待之本體乎  
感遇聚散為風雨雪霜者其流行之妙用乎此在  
既有天地人物之後繁然而有象者也有象者皆

用也然則理於何附曰氣之順而不妄不得已而然者即理之所以即氣而存而不雜乎氣者也然則由是而之焉何也曰塞吾其體帥吾其性故得天地之氣為周身之氣而形生焉得天地之理為浩然之氣而性成焉此人之所以可達於天也然則由是而之焉又何也曰理以氣異氣以形殊故理之所得適如氣之所受而賢與愚分人與物判焉形所各具即為氣所由分而人與物分偏全物

與物分靈蠢焉此人之所以獨貴於物也然則何以體之曰聖人踐形君子養氣若是者能體之

氣聚則離明得施而有形氣不聚則離明不得施而無形方其聚也安得不謂之客方其散也安得遽謂之無故聖人仰觀俯察但云知幽明之故不云知有無之故盈天地之間者法象而已文理之察非離不相睹也方其形也有以知幽之因方其不形也有以知明之故徵引易說卦之九章離為目上傳之四章仰以觀於

天文俯以察於地理是故知幽明之故十一章法象莫大乎天地上傳之五章成象之謂乾效法之謂坤朱子曰象是未成形之意法是一成已定之物

或問朱子曰離明何謂也曰此說似難曉有作日光說有作目說看來只是氣聚則目得而見不聚則不得而見易謂離為目是也○形之時其幽之因已在此不形之際其明之故已在此聚者散之因散者聚之故

補訓此以幽明字駁有無字間老子有生於無之說也離明字不重只是說可見不可見離明謂目之明所能見也聚將復散暫見故為客此便伏幽之因散將復聚而有形故不可謂之無此便伏明之故文理即天文地理與天象地法是一非二

華注盈天地四句中氣聚則離明得施四句意方其形也四句中其聚也四句意

補注二察字不同下察著也天文地理上下昭著也

張注謂之幽明則顯仁藏用其理具在謂之有無則  
截然彼此竟分二見矣

愚按此與下節大意皆明虛空即氣之意而此以  
幽明駁有無之說也曰客曰無本上太虛無形一  
節而言○語意云世所以有有無之見者以目之  
所見論之耳不知氣聚則目可見而有形氣不聚  
則目不可見而無形其有形也特暫來而即去耳  
非真有也安得不謂之客其無形也形散而氣自

在特離明不得施耳安得遽謂之無易言聖人之  
仰觀俯察而但云知幽明之故不云知有無之故  
由此故也夫氣之聚散何以必用離明蓋盈天地  
之間者地之法天之象而已其文理之昭著固非  
離不相覩也然方其形而為明也有以知其幽之  
因已在此方其不形而為幽也有以知其明之故  
已在此而謂可以有無言乎哉。宜作兩截看上  
八句即有無隱顯通一無二意聖人三句引易成

語以証之盈天地之間以下正申明上半節意知  
幽之因知明之故亦大槩論理如此非論聖人之  
事也補訓謂上截言幽明之故下截言聖人知幽  
明之故文義未合

氣之聚散於太虛猶冰凝釋於水知太虛即氣則無無  
故聖人語性與天道之極盡於參伍之神變易而已諸  
子淺妄有有無之分非窮理之學也

徵引易上傳之十章參伍以變錯綜其數本義參者



三數之也伍者五數之也謂揲著求卦之事

集解此只是明虛氣合一之意言氣之聚散即太虛之所為則太虛非離氣而入於渺茫者矣故知此則無無蓋不以無視太虛之理也氣之往來升降為參伍其理則兩在而不可測所謂神也神即在參伍之間故曰參伍之神聖人言性與天道之極如曰一陰一陽之謂道曰立天之道曰陰與陽立地之道曰柔與剛立人之道曰仁與義是聖人言性與天道之極

致不過盡於參伍之神所流行變易者而已未嘗於陰陽參伍變易之外別求一端虛無懸空不着於氣者以為性與天道也安得有有無之分哉

愚按此節大意以聚散駁有無之說也。語意云夫氣與虛豈二物乎氣之聚而有形散而無形皆太虛所為虛與氣非有二也猶冰之凝而為水釋而為水皆不外於水水與冰非有二也知太虛即氣而非二則不可以虛為無矣故聖人語性與天

道之極致亦不過即陰陽參伍之神變易不測者  
盡其理而無餘已老釋諸子識見淺妄乃以虛與  
氣謬分有無蓋不能窮聚散變易之理而陷於詖  
淫者也烏足信乎○參伍之神謂陰陽也變易即  
謂參伍之神蓋陰陽二氣陰變為陽陽變為陰往  
來變化不可窮詰故曰參伍之神耳無無下無字  
指太虛言與下有無無字相應以闢二氏有生於  
無等語也聚散字止就氣言即前節其聚其散之

云乃客形變化之小聚散非萬物復聚為太虛之  
大聚散也諸家謂氣散歸虛與下參伍變易之義  
不合而理亦未瑩又此性字指太虛之體言亦與  
論語異旨

太虛為清清則無礙無礙故神反清為濁濁則礙礙則  
形

程子曰一氣相涵周而無餘謂氣外有神神外有氣  
是兩之也清者為神濁者何獨非神乎。問太虛之

說本是說無極却只說得無字朱子曰無極是該貫  
虛實清濁而言無極字落在中間太虛字落在一邊  
了便是難說聖人熟了說出便恁地平正而今把意  
思去形容他却有時偏了明道說氣外無神神外無  
氣謂清者為神則濁者非神乎後來亦有人與橫渠  
說橫渠却云清者可以該濁虛者可以該實却不知  
形而上者還他是理形而下者還他是氣既說是虛  
便是與實對了既說是清便是與濁對了

高注此言清濁形神之別欲人存神而不囿於形也  
補注太虛為清清則無礙是陰陽兩端循環不已者  
也反清為濁濁則礙是游氣紛擾合而成質者也蓋  
反清為氣之渣滓神化之糟粕故濁

愚按此與下節皆太虛之第二層也前謂之太和  
者以其氣之流行而統言之此謂之太虛者以其  
氣之清通而析言之其實一也此篇首節以氣與  
神對次節以本體與客形對天地之氣節以聚與

散對而此節尤為著明蓋神無不在而必屬之清者猶性無不在而於喜怒哀樂未發時尤易見也張子又自謂虛可該實清可該濁者自人物未生之始以及人物既生之後而太虛皆統貫而行乎其中故言雖對而意自串如言喜怒哀樂未發而喜怒哀樂之情實無不具於其中也然以神字截斷在清一邊說終是偏處蓋纔言太虛便已不能不與實對纔言清便已不能不與濁對以形下之

氣而況形上之理固宜其不能盡也若程朱所言  
則天地之間清濁皆氣而理宰其中故鳶飛魚躍  
花落鳥啼處處皆道即處處皆神何嘗離而二之  
乎○語意云夫人亦知神與形所由分乎湛然太  
虛者為氣之至清清則虛明通達而無所滯礙無  
所滯礙故神妙而不可測若清之反為氣之濁濁  
則凝聚而有所滯礙有所滯礙則局於形是二者  
不可相無也然則蔽於形而不能存神與遺形以



求神者皆可以返矣。○篇內清濁聚散字太虛為清之清濁以太虛與萬有對氣不能不聚而為萬物之聚散以萬物與太虛對此氣之大清濁大聚散也浮而上者陽之清之清濁以天地自相對其聚其散氣之聚散於太虛之聚散以客形之變化者自相對舉一事之清濁聚散而言也亦皆須知其不同處

凡氣清則通昏則壅清極則神故聚而有間則風行而

聲聞具達清之驗歟不行而至通之極歟

集釋此發明太虛為清以下之意

補訓更即氣推言之凡氣合太虛而清則通反太虛而昏則壅塞而不通若清極則不但通而且神妙不測矣故氣之聚而有間隙以通之則風行而其聲聞具達非清則通之驗歟且不見其行之迹而無所不至豈非通之極而神歟即風而凡氣可知矣。有聲可聞故曰聲聞具達者無所不達也不行而至仍以

風言

由太虛有天之名由氣化有道之名合虛與氣有性之名合性與知覺有心之名

朱子曰本只是一箇太虛漸細分得密耳且太虛便是四者之總體而不離乎四者而言由氣化有道之名氣化是陰陽造化寒暑晝夜雨露霜雪山川木石金水火土皆是只此便是太虛但雜却氣化說雖雜氣化說而實不離乎太虛未說人物各具當然之理

處合虛與氣有性之名有這氣道理便隨在裏面無此氣則道理無安頓處如水中月湏是有此水方映得月心之知覺又是那氣之虛靈底聰明視聽作為運用皆是有這知覺方運用得這道理所以張子說人能弘道是心能盡性非道弘人是性不知檢其心邵子說心者性之邪郭此等語皆秦漢以下人道不到。由太虛有天之名都是箇自然底由氣化有道之名是虛底物在實上見無形底因有形而見氣有

形而虛無迹以有形之氣具無迹之理故謂之性也  
○由太虛有天之名合虛與氣有性之名是天命之  
謂性管此兩句由氣化有道之名是率性之謂道管  
此一句合性與知覺有心之名此又是天命之謂性  
這下管此一句

補訓此舉天道性心之名不外乎理氣二者而已。  
太虛屬理氣化屬氣氣即陰陽之氣變變化化者也  
性雖合虛與氣而以太虛之理為主氣在心則有知

覺故合性之理與知覺之氣而謂之心心者氣之靈而理所寓者也

李注太虛無形氣之本體此天之所以為天也中涵動靜相感之性是生絪縕相盪之始此太和所以為道也虛者性之體氣者性之質此天所以命人之性也性者真精之合知覺者神智之發此人之所以為心也

愚按此節首句即太虛之第一層而以為有天之

名者蓋造化之初此太虛在造化上者既生天地則天地亦即此以生人物其理一耳次句即太虛之第二層所以生人物之具也心性以下則以人之得於天者言從虛說到氣從虛與氣說到人之性與人之心雖天人分言實相疊而下○此節孟子盡其心者章朱註採入

鬼神者二氣之良能也聖者至誠得天之謂神者太虛妙應之目凡天地法象皆神化之糟粕爾

徵引糟粕見塊然太虛節法象見離明得施節

朱子曰伊川謂鬼神者造化之迹却不如橫渠所謂二氣良能蓋程說固好但只渾淪在這裏張說分明便見有箇陰陽在。問良能之義曰只是二氣之自然者耳屈伸往來是二氣自然能如此

補訓此以下言陰陽二氣之妙用而此節兼言鬼神聖神當重二氣良能與太虛妙應聖者是襯貼語二氣良能中即有太虛妙應之神太虛妙應即是神化



○世所謂鬼神者非他也即二氣之良能二氣之外  
無鬼神也所謂聖者非他也即至誠得乎天道之謂  
天道之外無聖也所謂神者非他也即太虛妙應無  
窮之目太虛之外無神也夫神化超乎法象之外凡  
天地法象皆神化之糟粕其粗迹可見者耳○鬼神  
對言陰陽屈伸之分也屈伸往來皆自然而然故曰  
良能神者非鬼神之神只是神妙意猶易言鬼神之  
情狀而又言神無方也聖人至誠无妄得天之道與

時消息亦自然而然也上言鬼神而以至誠得天言聖亦見聖之契合鬼神處天地間之有法有象皆神化之糟粕當於糟粕認神化無徒見糟粕而遺神化也

張注二氣之良能此語極精蓋鬼神不專屬氣比二氣又精是理氣接縫之際也朱子謂伊川不如橫渠說得好蓋伊川只說得鬼神後半截事只在天地功用上見之橫渠則直究其性情合理與氣而為言也

集解得天者與天為一也無在而無乎不在無為而無所不為故謂之妙應

愚按妙應太虛之第二層也就用處言故言妙應補訓謂神者非即鬼神之神固是然言神化則神在其中言神則鬼神在其中矣曰二氣良能曰太虛妙應非即神化而何○友人宋子銳臣曰鬼神兩而化也神者一而神也糟粕即體物之物也

天道不窮寒暑已衆動不窮屈伸已鬼神之實不越二

端而已矣

李注申上條二氣良能之說

集解天道之所以不窮寒暑推遷而已衆動之所以不窮屈伸相禪而已寒也屈也鬼也暑也伸也神也鬼神之所以為鬼神不越此寒暑屈伸二者而已非謂別有一鬼神如佛老所云也

張注此段言鬼神之功效即程子所謂天地之功用而造化之迹者也

愚按此節雖申上條之說而其義較粗蓋言良能則二氣在其中而二氣不足該良能之義故也

兩不立則一不可見一不可見則兩之用息兩體者虛實也動靜也聚散也清濁也其究一而已矣

補訓此承上而言二端之本一也諸家多以太極陰陽為說其理固是但張子是論二氣非周子太極陰陽之謂所謂一者言二氣本一耳○有兩必有一為之體有一必有兩以為之用如兩不立則一之體無

可見一不可見則兩之用亦息所謂兩體者何也如  
虛與實也動與靜也聚與散也清與濁也皆兩也兩  
不離一其究歸於一而已蓋二氣實一氣之消長也  
○陽虛陰實陽動陰靜陽聚陰散陽清陰濁集釋以  
散屬陽聚屬陰非也聚則為有散則為無豈有者為  
陰無者為陽乎

愚按此節上虛下實兩體以下數語正明兩與一  
之實皆言氣也與太極無涉下節感而後通亦然

補訓得之

感而後有通不有兩則無一故聖人以剛柔立本乾坤毀則无以見易

徵引易下傳之一章剛柔者立本者也上傳之十二章乾坤毀則无以見易本義乾坤毀謂卦畫不立○補注此又申明上章之意

補訓夫氣必兩者相感而後有其流通之妙如不有兩者相感則無以見一之通矣故聖人作易以剛柔

立其本剛者乾也柔者坤也若乾坤毀則無以見易  
易必有乾坤者所謂兩也有乾坤而變易於是出所  
謂一也即感而後通之意也。剛柔即陰陽聖人以  
陽陰為作易之本故曰以剛柔立本剛柔立本是正  
言乾坤毀是反言乾坤毀則無所謂剛柔

李注兩者相對方可言感感而能通非一而何故非  
兩無以立感之體非一無以致通之用所謂兩不立  
一不可見一不可見兩之用息者此也



游氣紛擾合而成質者生人物之萬殊其陰陽兩端循環不已者立天地之大義

朱子曰此段專說氣未及言理游氣紛擾此言氣到此已是渣滓麤濁者去生人物蓋氣之用也動靜兩端說氣之本上章言塊然太虛一段亦是發明此意。陰陽即氣也豈陰陽之外復有游氣耶所謂游氣者指其所以賦予萬物一物各得一箇性命便有一箇形質此皆氣合而成之也。陰陽循環如磨游氣

紛擾如磨中出者易曰陰陽相摩八卦相盪鼓之以雷霆潤之以風雨日月運行一寒一暑此陰陽之循環也乾道成男坤道成女此游氣之紛擾也。循環不已者乾道變化也合而成質者各正性命也。晝夜運而無息便是陰陽之兩端其四邊散出紛擾者便是游氣以生人物之萬殊如麪磨相似其四邊只管層層撒出天地之氣運轉無已只管層層生出人物其中有麤有細如人物有偏有正。游是散殊此

如一箇水車一上一下兩邊只管滾轉這便是循環  
不已立天地之大義底一上一下只管滾轉中間帶  
得水灌溉得所在便是生人物之萬殊天地之間二  
氣只管運轉不知不覺生出一箇人不知不覺又生  
出一箇物即他這箇幹轉便是生物時節○游氣是  
氣之發散生物底游亦流行之意紛擾者參錯不齊  
既生物便是游氣若是生物常運行而不息者二氣  
初無增損也○此固是一物但渠所說游氣紛擾合

而成質恰是指陰陽交會言之陰陽兩端循環不已  
却是指那分開底說蓋陰陽只管混了闕闕了混故  
周子云混兮闕兮其無窮兮○游氣是裏面底譬如  
一箇扇相似扇便是立天地大義底扇出風來便是  
生人物底

補訓陰陽只管循環不已自有游氣紛擾生人生物  
游氣紛擾不礙陰陽之循環不已游訓游散只是動  
盪意天地之大義以氣化言非以形體言大義猶言

天地之道易所謂立天之道立地之道是也

張注此段是倒裝文法陰陽循環不已而後有游氣紛擾散出而生人物要者這道理明白無如太極圖所云無極之真二五之精妙合而凝等語尤詳細

愚按此節大意以氣之立天地生人物者分體用而言之也游氣成質即所謂感遇聚散流形融結者也陰陽循環即所謂升降飛揚浮清降濁者也皆在太虛第二層內然游氣無時不成質陰陽亦

無時不流行有體用而非二物

日月相推而明生寒暑相推而歲成神易無方體一陰一陽陰陽不測皆所謂通乎晝夜之道也

徵引易下傳之五章日往則月來月往則日來日月相推而明生焉寒往則暑來暑往則寒來寒暑相推而歲成焉上傳之四章通乎晝夜之道而知故神無方而易無體五章一陰一陽之謂道又云陰陽不測之謂神

補訓日陽也月陰也日月相推遷而明生不窮焉寒陰也暑陽也寒暑相推遷而歲功以成焉其神妙無方所變易無形體一陰繼以一陽一陽繼以一陰陰陽變化不測總而言之皆所謂通乎晝夜之道也。推者推去彼而此方來也明生明之相繼生生不窮也神無方易無體不僅日月寒暑上見而即日月寒暑亦可以見矣故接云神無方易無體陰陽不測云云也

愚按此節大意即日月寒暑見二氣循環之妙也  
雖全以易辭成文非注釋之體。當分三層首二  
句舉日月寒暑言之中三句見其神妙不測末句  
總斷神易之理陰陽變化之妙無時無處不然而  
即日月寒暑之相推可見故曰此皆通乎晝夜之  
道也日與暑即晝之道月與寒即夜之道

晝夜者天之一息乎寒暑者天之晝夜乎天道春秋分  
而氣易猶人一寤寐而魂交魂交成夢百感紛紜對寤



而言一身之晝夜也氣交為春萬物糅錯對秋而言天之晝夜也氣本之虛則湛本無形感而生則聚而有象有象斯有對對必反其為有反斯有仇仇必和而解故愛惡之情同出於太虛而卒歸於物欲倏而生忽而成不容有毫髮之間其神矣夫

徵引莊子齊物論其寐也魂交其覺也形開注司馬云魂交精神交錯也

華注承上通乎晝夜之道以明天道人道總不外此

天道春秋分至天之晝夜也正明寒暑者天之晝夜  
意氣本之虛以下又明天地間恩仇愛惡總是陰陽  
聚散之所為是亦一晝夜也由張子之意推之則人  
身之一呼一吸一喜一怒以至古今氣運之剝復人  
事之治亂倏生忽成亦一晝夜也無大無小無久無  
暫晝夜二字可以畢該而其本皆出於虛其用則著  
於物欲此物欲字未便是不好字眼神字從循環不  
已上看出二氣本一一故神也

補訓春秋分只是說分春分秋非厯之春分秋分也  
補注太泥夏暑冬寒而云春秋者由春至夏而暑由  
秋至冬而寒是分春秋而寒暑之氣因以易也魂交  
交字對易字者當為交接之交以寐言則是魂交成  
夢以寤言亦是魂交成寤百感紛紜是夢境氣交亦  
是交接之交猶氣易也春固氣交秋亦氣交萬物雜  
然並生故曰糅錯氣本之虛二句又推上一層本之  
虛者以太虛為根本也有對而反而仇而和解只照

寒暑之氣言較明集解以日月薄蝕男女反目言殊不合相反則惡相合則愛集釋云春生可愛秋殺可惡愛之惡之人心之私愛惡全以人言與上文不聯倏生忽成承上感而生生字來生成渾說集釋分春生秋成亦可但不宜以生成跟愛惡說即此可見寒暑循環無毫髮之間猶晝夜也

愚按此節大意皆明天道之神也虛是第一層反仇愛惡以下皆在第二層內重一神字前神字俱

以妙應不測者言此重神速意。○語意云夫天道之神又有可得而言者。晝夜者其天之一息乎。一晝一夜猶一呼吸之速也。寒暑者其天之晝夜乎。一寒一暑猶一昏旦之暫也。蓋天道分春秋而寒暑之氣變如人之一寤寐而魂以交易人之寐時魂交成夢百感紛紜變幻不一以之對寤而言寤則夜寤則晝是一身之晝夜也。天之氣交為春萬物糅錯而生以之對秋而言春則晝秋則夜是天

之晝夜也夫氣之本體是為太虛其初亦湛然至清本無形象耳及氣之相感而生則聚而有可見之象既有象斯有對如寒與暑對也有對必反其所為如寒暑相反也有反斯有仇如寒暑之不容也仇必有以和而解如寒由溫而暑至暑由涼而寒至也和解則愛反仇則惡是天道愛惡之情同出於太虛之一本而其後卒歸於物欲之萬殊故其二氣紛擾化育不窮條而生忽而成不容有

毫髮之間斷豈不神妙莫測矣乎故曰寒暑者天之晝夜也。首句形起次句天道春秋分以下皆明次句意只以人之寤寐形容天道不以天人並重一寒一暑歷四時而成歲在天道則如一晝夜然便有倏生忽成而極其神意氣本之虛以下又提起一筆而詳推其理言其始本太虛而無形也一至聚而有象則遂有反仇和解愛惡之情紛紜參錯不可窮紀同出於太虛之無形而卒歸於物

欲之有迹此數句即見一氣循環神速不測之妙  
故接云倏生忽成無毫髮之間其神矣夫正應轉  
天之晝夜句反仇和解愛惡物欲等字皆以人事  
形容天道愛者相生相合之意惡者相制相克之  
意物欲云者天道之變化客形如人之有感而動  
隨物而遷千狀萬態無復本一之體即上象對反  
仇和解數句意非私欲之謂也倏生忽成又即氣  
化之生人生物而言生生不息成成相繼神速不



測何間之有舊說皆以物欲屬人言故語氣不能  
一貫李注遂分氣本之虛以下另為一節於修身  
忽成句反難安頓矣惟華注畧得其意而以天道  
人道並言亦誤

造化所成無一物相肖者以是知萬物雖多其實一物  
無無陰陽者以是知天地變化二端而已矣

張子語錄人與動植之類已是大分不齊於其類中  
又極有不齊某嘗謂天下之物無兩箇有相似者雖

一件物亦有陰陽左右譬之人一身中兩手為相似  
然而有左右一手之中五指而復有長短直至於毛  
髮之類亦無有一相似至如同父母之兄弟不惟其  
心之不相似以至聲音形狀亦莫有同者以此見直  
無一同者

李注以造化成物之各異知物之各具陰陽以物之  
各具陰陽知天地變化之不出於陰陽也

華注陰陽雖只兩端其感遇凝聚却萬有不齊所以

形質各不相肖就其不相肖而益可悟天地之化不  
外於陰陽也

愚按上四句因形之不相肖而知無物無陰陽此  
在萬殊處說陰陽下二句因物之各具一陰陽而  
知天地之變化以生物者總不外陰陽二端此方  
見萬殊之一本意兩以是知字相疊而下舊說於  
無一物句即謂萬殊一本語氣未合不相肖不但  
人與物異飛與走異即人之各具一面目肢體飛

走之族各三百有六十皆足見其不同蓋就形體言之集釋並及聖愚之異亦非是

萬物形色神之糟粕性與天道云者易而已矣心所以萬殊者感外物為不一也天大無外其為感者絪縕二端而已

李注易者變化也神者變化之妙也性與天道在其  
中矣

張注心所以萬殊二句此就無主宰之心言之非論

心之本體也天下同歸而殊塗一致而百慮何不一之有綢緼二端而已須知綢緼中便有許多不測道理在

愚按此節大意亦明天道之神也○語意云夫天道之妙豈有外於神乎萬物之形色氣也而即神之糟粕非能離神以為形也即理之微者莫過於性與天道亦不外陰陽變易之神而已豈有他哉彼人心所以有萬殊而不一者特以物之所感者

不同故不能一而神也若天之大而無外其所感者不外陰陽二端絪縕交密而已而有不極其神者乎○形色所該者廣凡散殊可象者皆是不專指人言心有萬殊者以人之有心襯起天道之自然也此節舊說皆不得其解惟吾友宋子銳臣之說得之宋云首二句見氣皆神之所為性與天道二句見理亦不外乎神言神又言易者神無方易無體其實一也惟一故神心不能一故不能得感

而遂通之神網緼則所謂清通不可象而神者也  
物之所以相感者利用出入莫知其鄉一萬物之妙者  
歟

徵引易上傳之十一章利用出入民咸用之謂之神  
說卦之六章神也者妙萬物而為言者也

華注此節發明神之為妙

集解如日月寒暑之推遷人物之終始山川之流峙  
皆物之相感氣也而其所以相感者理也利用出入

往來無礙無所不在而不可測者也故曰一萬物之妙一者貫通之意言其統貫乎萬物而極其妙也

補訓引來三句一串下皆是証一神字利用妙萬物固是神莫知其鄉亦只說神不說心物相感而生是生生不窮意非謂此感彼應也利用出入用以出用以入無不利利即神處神無形故莫知其鄉

愚按此以首句作一呼下三句作一應神理自明氣與志天與人有交勝之理聖人在上而下民咨氣壹



之動志也鳳凰儀志壹之動氣也

徵引書堯典洪水滔天下民其咨益稷簫韶九成鳳凰來儀

華注此節重在志能勝氣人能勝天上上文屢言陰陽交感萬事萬物皆由之以出入則似聖人無權而不知補救調變乎陰陽者在人裁成輔相乎天地者在人故以志壹動氣明人定可以勝天也下民咨鳳凰儀舉一以見端

補訓氣與志交勝天與人交勝下文只証氣志而天  
人自見蓋以天配氣以人配志氣壹動志即天定之  
勝人志壹動氣即人定之勝天也動志動氣是借用  
語只大槩說集釋以動志為堯之志動氣為鳥獸之  
氣覺拘蓋水災尚可言氣而作樂難以貼志也

愚按氣謂氣數志謂人事拘本旨則難解矣

正蒙初義卷一